

WA

DISPUTATIO MEDICA  
INAUGURALIS  
DE  
PLEURITIDE.  
QUAM

Annunte Deo Opt. Max.

*Ex auctoritate Magnifici Rectoris,*

**D. HERMANNI BOERHAAVE,**

A. L. M. PHILOSOPHIÆ ET MEDICINÆ DOCTORIS,  
HUJUSQUE ET BOTANICES IN ACADEMIA LUG-  
DUNO-BATAVA PROFESSORIS ORDINARIJ,

NEC NON

*Amplissimi Senatûs Academici Consensu, & Nobilissima Facul-  
tatis MEDICÆ Decreto,*

**PRO GRADU DOCTORATUS,**

Summisque in MEDICINA Honoribus, & Privilegiis  
rite ac legitime consequendis,

*Publico ac solenni Examini submittit*

**JOHANNES COCQUELLE.** Mediob. Zeelandus.

*Ad diem 11. Octobr. 1714. hora locoque solitis.*



LUGDUNI BATAVORUM,  
Apud ISAACUM SEVERINUM. Bibliopolam.

**D. D. ANTONIO COCQUELLE,**  
IN URBE MEDIOBURGENSI MERCATORI CELEBRI,  
FRATRI NATU MAXIMO, EX INTIMO CORDE, AD  
ULTIMUM USQUE ROGUM, FRATERNO SEMPER  
AMORE COLENDO, ÆSTIMANDO.

**D. D. ABRAHAMO COCQUELLE,**  
IN URBE EADEM MERCATORI EXIMIO, PATRI HO-  
NORATISSIMO, SUMMO ANIMI CONATU, AD UL-  
TIMUM VITÆ TERMINUM, AMANDO, VENE-  
RANDO.

Hanc Disputationem eo,  
quo par est, obsequio

D. D. D.

**JOH. COCQUELLE.** Author.





DISPUTATIO MEDICA  
INAUGURALIS.  
DE  
PLEURITIDE.

C A P. I.

§. I.



Leuritis est dolor punctorius circa costas , cum respiratione difficili , tussi crebrâ , humida vel sicca , febre continuâ acutâ , pulsu duro.

§. II.

Nomen habet a loco quem occupat , membranâ scilicet pleurâ , quæ an sola infecta sit , postea inquiretur.

§. III.

Ob varia quæ secum fert symptomata , varium locum quem occupat , varias causas , & similes circumstantias , varias quoque apud aucthores accepit denominationes , unde dicitur Pleuritis humida , vel



sicca, biliosa, vel sanguinolenta, vera vel notha, idiopathica vel sympathica, sporadica, vel epidemica: oritur quoque pleuritis, vel a causa quadam manifesta, vel ab aëris incognita & venenata quadam dispositione; quæ divisio quamvis pluribus neglecta scriptoribus medicis, Hippocrati tamen & Sydenhamio quam-accuratissime observata, & castissime tradita, sola basis, & una methodus existit, quâ ex arte tractetur atrocissimus hicce morbus: ordinis vero gratiâ triplicem hicce considero pleuritidem, 1. Idiopathicam, sive a causa nota manifesta oriundam. 2. Sympathicam, sive ex alio morbo natam. 3. Epidemicam sive ex incognitâ aëris dispositione ortam: ad has enim species reliquæ facile deducuntur.

§. IV.

Prima igitur pleuritis oritur, quotiescunque causa quædam externa producit inflammationem in membrana pleuræ. Secunda species orietur, quoties morbi causa continens determinata ad pleuram idem efficit. Epidemica vero continget pleuritis, quoties in aëre latet ea potestas, quæ præcise afficiendo membranam pleuræ eundem morbum cum pluribus hominibus simul degentibus communicat, cujus hæc sequens fere historia.

Ingreditur fere omni anni tempore, sed tamen potissimum inter ver & æstatem; aggreditur præ reliquis temperamento sanguineo præditos, & juxta Hippocratem nunquam vel raro illos ante pubertatem, sæpe etiam rusticos, & quibus dura jam membra sunt fracta labore, sed juxta Hippocratem raro illos qui acidum eructant; incipit cum horrore & rigore, & observavit Vir celeberrimus Boerhave ante aliquot annos in Pleuritide epidemica, certissimum præsagium invasuræ pleuritidis fuisse, ingentem famem, ante omnia symptomata, quæ adeo tunc erat illis hominibus nota, ut, dum viderent aliquem hac obrui, eum monerent, jam curaret pleuritidem, certo certius mox invasuram, quod quam optime tunc successit; deinde debilitantur, & lassifunt, incipit tunc calor, sitis, inquietudo, & febris omnia symptomata, post paucas horas dolor ingens punctorius occupat pectus circa costas, qui nunc versus homoplatam, nunc versus dorsi spinam, nunc e contra versus anteriora, propagatur, tussicula nunc est arida, nunc & quidem frequenter, cum liquidis excrementis, primo spumosis, tunc sanguineis particulis intermistis, vel Juxta Hippocratem, nunc rejicit subbiliosa, colorem mali punici referencia, nisi quid irtus ruptum fuerit, tunc enim sanguinem post eruptionem evomunt, hæc-  
que



que subcruenta Hippocrati, si post flavedinem sanguis intermisceatur; dein sputa quoque fiunt saniosa, decubitus in latus inflammatum nunc est facilis, in oppositam vero si æger decumbat partem, ingentem nunc percipit dolorem, nunc minus doloris percipit, si in oppositam partem decumbat, nunc in quodcumque latus se convertat, dolore tamen urgetur ingenti; lateralis vero in dorso morbus, hoc aliis præstat, dorsum velut ex plaga dolor occupat, ingemescit, confertim respirat, confertim pauca expuit, & corpus lassitudine vexatur, febris interea pari passu procedit, augetur ratione symptomatum, quæ ab ipsa sequuntur, si vero liberior expectoretur materies, tunc eâ ratione minuitur sensim, si vero non concoquatur materies, sed tenuis & cruda maneat, ut in morbi principio, tunc febris aucta cum suis symptomatibus ægrum ferè occidit; alvus vero interea nunc est nimis adstricta, nunc verò laxa nimis; interdum contingit, ubi morbus admodum invaluit, & nulla V. S. fuit celebrata, quod æger ne quidem valeat tussire, sed immani laborans dyspnæâ, fere suffocetur, quæ dyspnæa aliquando tanta est, ut ne quidem ad debitum spatium pectus expandere audeat; ob dolorem atrocissimum oriuntur vigiliæ, ciborum fastidium, malarum rubor, tussis arida, linguæ siccitas & asperitas, morbo vero in pejus vergente, sequitur alvi fluor spumosus, urina frequenter & paucâ copiâ, & alba emittitur; fit pulsus densior, celer, fortis, quasi tactum ferrans, sed aliquando summopere fallens, dum doloris metu se suffocat æger, continendo pectus ambobus brachiis ne dilatetur, & sic pulmone expansionem impedit, adeoque sanguinem in pulmone sistit, hinc pulsus se non prodit, quia cor sinistrum paucum sanguinem recipit; respiratio quammaxime dolens, parva, sæpe repetita, vultus & thoracis rosida humectatio, mentis alienatio sive delirium, aliquando occupantur comate, & in gravem soporem incidunt, gutturis oritur stridor, vel sonus interius resonans in ea qua patitur parte; rejiciuntur quoque accepta per Vomitus, jacendi negata atque displicens omnis est positio, summa cum inquietudine, corporisque jactatione; sputa per omnes gradus coloris deviant a naturâ, & tandem nigrescunt, imo morbi vehementia vasculis ruptis ipse sanguis ore rejicitur; aliquando post ingentem inflammationem & omissam V. S. si die septimo aut nono, aut undecimo sanus non fuerit, abit in suppurationem, unde pure intra cavitatem pectoris effuso, quamvis febris & omnia ejus fere symptomata sublata sint, postea tamen causa mortis nascitur; ultimo cogente periculo



lo fit celerrima respiratio , præcordiorum suspensa adductio , pulsus inordinatus aut deficiens , unde tandem peripneumoniâ moritur.

## C A P. I I.

### §. I.

**S**ignum diagnosticum pleuritidis nullum datur : sed signa plura simul, sequentia docent, an sit pleuritis in ægro & qualis:

1. Igitur si dolor sit circa costas, sed punctorius; 2. Si respiratio sit difficilis, dolorem magis augens inspirando, minuens vero expirando, vel in retentione animi; 3. Cum tussi vel aridâ, vel humidâ; 4. Si pulsus sit durus & serratus, (excepto eo casu quem ante monui); 5. Si adsit febris acuta continua; hæc quinque symptomata simul collecta menti imprimunt ideam pleuritidis, sed veræ, a quacunque causa oriundæ: an vero sit Idiopathica & Sporadica, noscitur, ex anni tempestate, causa prægressa, sexu, ætate; Symptomatica noscitur ex morbo prægresso, causis prægressis, anni tempore, ætate vitæ, & sexu.

Epidemica cognoscitur ex sola anni constitutione.

### §. II.

Accidunt tamen quædam adhuc in humano corpore phænomena, quæ non nisi ab artis perito, a vera pleuritide distinguuntur, qualia præcipua sunt, dolor lateris, (pleuritis notha dicta) abscessus lateris, vomica, dyspnæa, coryza, asthma: conveniunt enim hæc omnia in uno cum symptomatibus, in vera pleuritide traditis, sic vero distinguuntur: in pleuritide notha, nulla adest febris, nullum sputum, dolor plerumque est vagus, quamvis diuturnus; in abscessu lateris febris adest, dolor circa costas, & sputi rejectio, & respiratio difficilis, at vero sic dignoscitur; febris non est adeò acuta, sed lenta, inordinata, cum horripilationibus & horroribus vagis, pulsus non est serratus, durus, sed undosus, dein eo tempore quo pus fit, sputa ejiciuntur, non amplius varia, sed unius generis, & sæpe quoque puris eminens collectio sentitur, quibus si tempus & causæ prægressæ addantur, dant certam morbi diagnosin: à Vomica distinguitur, quod solummodo sit gravitas in pectore cum respiratione difficili; à reliquis dignoscitur, dolore, febre, & celeritate, quibus si addun-

tur



rum causæ antecedentes , habetur clara & intima morbi idea & indoles.

## §. III.

Morbi nonnulli acuti in omnibus cum pleuritide conveniunt, loco & inde dependentibus symptomatibus exceptis , ita vero distinguuntur: si locus effectus sit diaphragma, tunc dolor sentitur ad extremum costarum, ad finem sterni, ventri pars ubi diaphragma est turget, & delirium adest.

Si mediastinum inflammetur, dolor non sentitur ad costas, nec dolor adeo extensus est.

Hepate inflammato, dolor sentitur in dextro plerumque latere, circa Hypochondria, non tamen pungens, sed gravans, percipitur quoque tumor infra costas nothas; pulsus est undosus, tussis minor & sicca, & minor respirandi difficultas, & si contingat hepar magnam partem inflammari, tunc urina fit citrina, & corporis color ictericus.

In peripneumonia dolor est gravativus, sed non pungens, nec in latere, at vero in pectoris medio, major est respirandi difficultas, nec nisi erecta cervice perficitur, pulsus autem & undosus & laxus.

## C A P. III.

### §. I.

**L**ocus affectus in pleuritide, est pleuræ membrana; sub costis Lenim, dorso, & internis pectoris, ad jugula usque, tenuis membrana robustaque ossibus inhærens substrata est, cui nomen succingens inditum est, in hac cum phlegmone oritur, ignis adest, cum tussi, & sputis variis pleuritis morbus iste appellatur: hæc verba vetustis-fimi fere authoris Aretæi Cappadocis in descriptione hujus morbi; maximam interim moverunt difficultatem scriptores recentiores, an solâ inflammata pleurâ posset dici pleuritis, & efficere atrocissima illa symptomata, incitati summopere sectione cadaverum, qua didicere, plerumque post mortem pulmonem fuisse nunc inflammatum, nunc suppuratum, gangræna vel grumoso plane sanguine ob-  
rutum; summopere quoque a priori est probabile, per ratiocinium, ex Institutis medicis, & structura corporis humani petitum, quod inflammata pleurâ, ob dolorem suppressâ respiratione, & pectore  
immo



immobili retento, pulmo quam citissime affici debeat, adeoque mortuo ægro nunc sanguine grumoso, nunc inflammatione &c., affectus reperiatur; hoc interim nihil facit ad pleuritidem qua pleuritis, sufficit modo inflammetur illa membrana, quæ costas succingens, pleura veteribus nominatur, illam autem posse inflammari, non tantum nos docet Theoria medica, sed sectio defunctorum tales nobis casus exhibet quam clarissimos.

Riverius libro 7. capite 2. invenisse se testatur, in multis defunctorum cadaveribus solam pleuram corruptam & putredine consumptam fuisse. Bonetus in sepulchreto anatomico libro 2, sect: 4, obs. 10, habet exemplum membranæ pleuræ lividæ & in gangrænam conversæ, certissima signa præcedentis inflammationis; & observ. 5, membrana pleuræ fuit reperta turgida, stagnante & accenso sanguine, & ibidem in additamentis membrana pleuræ intus fuit fere nigra reddita, & sphacelo corrupta, & obs. 16, pleura fuit siderata, & apud Willisium in capite de phrenitide, pleura quoque suppurata fuit.

An igitur tenuis illa membrana solummodo afficitur, an vero nonnullæ fibræ intercostales huic quam arctissime annexæ? videtur id affirmari per dolorem inspiratione maxime auctum.

## C A P. I V.

### §. I.

**E**x præcedentibus, ni fallar, satis superque patuit, pleuritidem veram esse inflammationem in vasis, membranam pleuram pervadentibus, si ergo quid sit inflammatio, quænam ejus causa, tum remota tum proxima, quosnam producat in corpore humano effectus, quinam varii sunt ejusdem exitus, explicuero, & eadem hæc membranæ pleuræ applicavero, non difficile erit, quædam intelligere, si non omnia, ad curam, prognosin hujus morbi, & cognoscere, & prævidere, & bono cum fructu in actum deducere.

Inflammatio autem passim describitur tumor præternaturalis, rubens, dolens, calens, renitens, pulsans, cui, si alicujus momenti sit, accedit febris acuta continua: Sed vero potius liquoris in vase cujuscunque locoque quovis stagnatio, urgente sanguine a tergo, materiam obstruentem, inflammationis indolem & ideam claram nobis exhibet.

Causa



Causa igitur proxima, seu ipsa inflammatio, continget, quoties liquor per vas fluere solitus, sistitur, ita ut transire nequeat, & subsecuturo humori viam intercludat, unde liquor a tergo vi cordis actus, a materia obstruente dum sistitur ( i. e. repellitur ), facit summam actionem & reactionem, attritum ad se invicem, ope cujus ignis elementalis omnibus experimentis idem, ac ignis unicuique eo nomine dictus, producit in corpore humano omnes eos effectus, quos ignis vulgaris: producit, unde Græci inflammationem deduxere, a verbo *φλέγω*, ardeo, Latini optime quoque nomine flammæ hunc affectum designavere.

Causa prædisponens corpori inhærens est vel vitium vasorum vel vitium humorum; quoad vasa, si in aliquâ corporis parte ea naturaliter sunt talia, ut facilius humores sistant quam in aliâ parte, unde videmus quosdam homines obnoxios sæpe redeunti ophtalmiæ, sic si pleuræ arteriolæ sunt angustiores quam alterius hominis, ad quæ pertinet scirrhus, callus, & pulmo adnatus, estque inhærens causa unde facile morbus hic producat: quoad sanguinem si sit lentus, spissus, inflammatorius, vel pure, ichore aliave quadam materiâ cacochymica imprægnatus.

Causæ remotæ omnis inflammationis petuntur ex sex rebus nonnaturalibus, vel ex quatuor rerum nonnaturalium classibus, inter quas primo occurrunt ingesta, copia vel qualitate peccantia, cibi, potus, aër, medicamenta, venena. 2. gesta, motus, quies corporis, somnus & vigiliæ. 3. retenta urinæ, alvi, sudoris sive perspirationis Santorii, & excreta nimiam copiam reddita, urinæ, sudoris, alvi, perspirationis insensibilis, seminis, &c. 4. quæ corpori applicantur v. gr. aër, vapor, fomentum, balneum, vestis, linimentum, unguentum, emplastrum, vulnus, contusio, erosio: omnes dictæ causæ, ex institutis medicis desumptæ, quæ ibi explicatæ & demonstratæ habentur, possunt efficere, ut vel ad humores vel ad vasa, vel ad utraque simul nascatur in corpore talis dispositio, unde sistuntur humores in quacunque corporis parte, sicque oriatur inflammatio, quæ si contingat in pleurâ membrana, nomine pleuritidis designatur.

Omnis tamen causa harum agit, vel in vasi vel humores. Vas vero redditur ineptum ad transmittendum, quod fit dum nimis arctatur & angustatur ab una præcedentium causarum, sic ligatura, compressio, ictus, nimia extensio, frigus aëris ingens, nimium vasorum robur,



stimulantia idem efficiunt, vel secundo, si vas initio ampliatur ita ut globuli sanguinei intrantes transire nequeant, quod fit vel a vasorum nimia laxitate vel liquorum nimio impetu; unde calor nimis & motus ingens, item vasorum laxitas hoc efficiunt, quo fomenta & balnea referuntur: humores vero redduntur inepti, si sint crassi, spissi, inflammatorii, quod fit, si aqua eorum exhalet, oleum tenue, & sal avolet, oleum crassum cum terrâ mutetur in irresolubilem fere materiem, quo pertinent omnes excretiones nimiae, sudoris, perspirationis sanctorianae. urinæ, æstus ingens, motus nimis, cibi acres, potus inopia, regio calida, & similia ad inflammationem in genere excitandam (ergo pleuritidem in specie) apta nata; sed huc usque modo foret obstructio, causa vero urgens materiam obstruentem & producens omnia in phlegmone symptomata, est cordis & arteriarum reciproca actio, sanguinem propellens & in hunc locum adigens.

Sit itaque homo perfecte sanus, per xxiv. horas plures, pauciores, magno se applicans labori, tunc per illum motum vasorum in humores, & humorum in vasa producit major actio, hinc humorum attenuatio, vasorum detritus, major humorum tenuium redditorum per excretoria lateralía, expressio, & reliquorum major inspissatio, unde prima dispositio ad diathesin inflammatoriam, hinc difficilior per minora Vasa transitus, glutinositas sed inflammatoria sensim aucta, sitis ingentis una causa; sed aucto motu, consolidatis & compactis quasi magis humoribus, vasa quoque magis compinguntur & consolidantur, & quia vascula quæ perreptant eorum membranas comprimuntur, hinc rigidiora fiunt, unde major nixus, renixus, adeoque ingens nascitur attritus, hinc omnia removentur quæ sunt in sphæra hujus activitatis, si non possunt celerem hunc motum sequi remanente (pro gradu motus celeris, pressione ingenti ad se invicem, & soliditate corporum motorum,) solâ materiâ subtilissimâ, penetrantissimâ, mobilissimâ, i. e. igne elementali, suâ indole spontaneâ producente effectus mox memorandos.

Eodem autem tempore, quo humores celerius per vasa feruntur, & attenuantur etiam, sicut ad excretoria cutis & alia, applicantur quoque sæpius & majori vi ad vasa cerebri & cerebelli, unde spiritus animales & vitales majori copia & motu feruntur ad cor, arterias & pulmones, & quoque ad membra voluntati subjecta, unde tantus impetus vasorum in humores aliquândiu permanet, vix sentiente homine, licet multa



multa eaque optima perdat assiduo, quare sanguinis circulus continuo adhuc augetur, omnia igitur quoque memorata symptomata, donec consumptis spiritibus, omni sanguinis tenuissimo expulso, homo volens nolens delassetur & fatigetur summopere, sed quoque simul ab iisdem dictis causis sanguini inducitur acrimonia alcalina, quamvis levissima.

Sanguis sic glutinosus inflammatorius, omni fere tenui aquoso spoliatus, & incipiente acrimonia oneratus, in homine profert dispositionem qua siti vexatur, unde instinctu naturali potum concupiscit, sed ob æstum plerumque gelidum sibi comparat; sed quia omnis sanguis semel transit per pulmones eo spatio temporis quo reliquum totum corpus perambulat, hinc ibi loci maximus effectus caloris sentitur; quo accedit Vicinitas causæ moventi nempe cordi, unde motu quasi automatico aërem frigidum undique capiat & quam libentissime pulmonibus haurit, quiescens jam ob jacturam virium, & summam debilitatem: His positis bibat ergo talis homo gelidum, statim ac pervenit frigus ad œsophagum, constringuntur vasa, accedente aëre frigido quem halitu haurit & corpori applicat denudato, unde vasa pectoris interne externe valde quoque angustantur, & constringuntur, interim eo momento tanta sanguinis copia non fertur ad cor, motus quippe muscularis suspenditur, hinc eo tempore cor sanguinem tanta vi non agit in sua vasa, hinc vasa diutius & fortius in nixu contractionis manent, quam si statim tanto impetu expanderentur.

Nonne hinc patet ratio quare homo gelidum potans dum in summo æstu versetur, manens in perpetuo motu minus sentiat inde incommodi quam si quiescat statim? pro variis jam circumstantiis, sexu, ætate, temperie &c. orietur nunc angina, nunc peripneumonia, pleuritis & alii morbi, statim & quidem eo momento quo vasa ab impetu sanguinis dilatata, a causa externa tam valide angustantur; sanguis lentus, & spissus, minori jam parum impetu actus sistitur, cessat motus & attritus, turbatur circulatio, oritur horror, i. e. levis refrigeratio, mox deinde oritur febris, sanguis enim in arteriis stagnat, hinc illæ arteriæ redduntur ineptæ, quæ sanguinem reliquum transmittant, venæ autem ex his arteriis oriundæ sanguinem suum ad cor deferunt, novum interim sanguinem non recipiunt, hinc collabuntur, sanguinis quoque circulo non obediunt, minor hinc nascitur proportio vasorum respectu humorum, quare inopia vasorum debet compensari motus celeritate, i. e. febris oriri.



Sanguis igitur celerius redit ad cor, celerius expellitur ex corde, celerius per omnia vasa fertur, ergo quoque per cerebrum & cerebellum, spiritus ergo qui sanguini adhuc insunt majori rursus copia secernuntur, & ad cor deferuntur, hinc duplex rursus causa cur cor celerius contrahatur, ubi tamen magna adest resistentia ad locum obstructum, febris igitur aderit, sed continua, est enim effectus causæ perpetuæ, sed acuta, id est cito crescit, cito perveniet ad statum, cito solvetur vel crisi bonâ vel morte, propter enim obstructionem omnia statim de momento in momentum augentur ita, ut cito vel resolvatur, vel sanguinis circulus plane sistatur.

Consideremus enim locum affectum adeo cordi vicinum, vasorum situm & structuram, quippe per quæ sanguinis circulus fit citissimus, per arterias intercostales ex corde, per venam azugon mox iterum in cor, hæc inquam nos docebunt, quod ibi loci (sicut & in statu naturali) sic in morbo debet esse circulus & impetus quam maximus, a quo vasa hæc tenerrima quam citissime rumpuntur, & plane locus destruitur.

Sanguis igitur expulsa magna copia humoris tenuis, tanto cum impetu corde pulsus, per arterias quam celerrime latus, occurrens loco obstructo, magna vi in eum impingit, hinc materiam magis compingit, (si non statim resolvatur) magisque tenacem reddit obstructionis, hinc ibi sistitur, & per lateralia omne tenue expellitur, crassum ibi condensatur, in arteriarum angustias quam fortissime adigitur, cum materia ulterius propelli non potest, urgente tamen a tergo reliquo sanguine, impetus omnis redundat in vasis latera, quæ expanduntur, tument & vicina comprimendo circulo quoque inutilia reddunt, hinc quoque plures venæ collabuntur, unde obstructio sensim augetur cum omnibus inde sequentibus, vasis ita expansis, expanduntur impetu membranæ, & elongantur nervi, unde doloris sensus imprimitur menti quam exactissimus, ob membranæ tenuitatem & nervorum copiam, hinc vasis magis magisque minutis, sanguis celerius ad cor redit, continuo major majorque fit febris, materia obstruens magis compingitur; sanguis magis lentus fit, & cordis impetus augetur, & celeritas contractionis, unde a tribus causis fit maximus attritus, eo validior quia corpora atterenda sint solidiora, vis atterens major, & celeriores ictus reciproci, hinc ignis verus per totum corpus, sed maxime in loco affecto colligitur.



Jam vero juxta experimenta chemica examinemus quid sanguini accidat humano, si ignis actioni applicetur, in initio omnis quæ ad huc ad est aqua fere insipida nullum signum Salis Alcalini vel acidi præbens exhalabit, tunc omne oleum tenue, fiet volatile, extricabitur a reliquis suis principiis, sal tunc ab oleo suo spoliatum, & ignis actionem vehementiorem recipiens fiet acre mutatur (potius vergit ad naturam alcalinam) fit volatile, oleum reliquum cum terra abit in massam spissam, lentam.

Hinc patet quare dantur pleuritides sæpe uno, duobus diebus necantes: quare sæpe in gangrænam abeunt citissimam: cur vero nunc ad duodecimum, vigesimum diem extendantur.

Scitur quoque, cur robustis & exercitatis ille morbus sit adeo perniciosus, contra debilibus, sæminis, & pueris.

Noscitur quoque, quid sit in morbis acutus tantus æstus, maxime circa præcordia, & quid denotet, quid frigus ad extrema & cur adeo lethale in eo casu.

Hinc quoque, qui acidum eructant, raro pleuritide, & morbo ullo acuto laborant, quod docent præcedentes paginae.

## §. II.

Si pleuritis sit epidemica tunc oriuntur fere ea omnia symptomata quæ a causa externa, per vim pestilentialem venenatam, nunc citius, nunc serius typum absolventem.

Docet tamen experientia, non esse impossibile, dari specificum, quod hunc morbum, dum inferi est, uno momento tollit, reliquis omnibus frustra tentandis, sed quale id est? Varium, difficile cognitu, an unquam idem?

Id tamen præ reliquis habet singulare, quod primis diebus certo omnes necet, posterius plures evadant, ultimo nemo moriatur, omnibus iisdem tentatis & in initio & in medio & in fine, prout accepi ab iis qui casibus interfuere.

## §. III.

Pleuritis symptomatica, nunc consistit in spasmu, nunc ex acrimonia humorum, nunc ex vera quoque inflammatione oritur, ut patet in passione hysterica, scorbutu, & febre acutâ.

## CAP. V.

## §. I.

**O**mnis pleuritis abit vel in sanitatem, vel in alium morbum, vel in mortem.

## §. II.

In Sanitatem, si resolvatur benigne, vel per excretionem mali, sive solâ naturâ, sive artis ope.

## §. III.

Excernitur materies morbi vel per largam hæmorrhagiam, sive per nares, sive per fluxum menstruum, vel hæmorrhoidalem, 2. si tertio die facile exspuat, lævia, æqualia, humida, rotunda; 3. per alvum, si illa biliosa exturbetur; 4. per urinæ ingentem fluxum.

## §. IV.

Quibus in morbo laterali lingua circa initia biliosa est, ii intra septem dies judicantur; quibus vero 3. ac 4. die, circa nonum. Hipp: coac: sec: 2. §. 383.

## §. V.

In morbo laterali affectis, dolores & alvum emolliri utile est, sputa colorari, nullos in pectore, strepitus fieri, urinam rite procedere: ibid. §. 386.

## §. VI.

Sputum si in morbo laterali, maturescere & exspui 3. die cæperit, ecleres fiunt solutiones ibid.

Biliosi



## §. VII.

Biliofi simul & sanguinei morbi laterales , fere nono die aut undecimo die judicantur ac maxime fervantur , quod si bis septem evaserint fervantur : ibid.

## §. VIII.

In omnibus autem laterum morbis & pulmonis , sputum prompte ac cito excreari , necesse est , flavumque sputo permixtum esse ; & flavum cui paucum sanguinis permixtum est, dolorem tollit ; ibid.

## §. IX.

Sputum quodcunque dolorem tollens, bonum est.

## §. X.

Per artem si rite tractetur facile sanatur , & quidem non minus certo & constanter, quam alii morbi. Sydenhamius.

## §. XI.

In alium morbum abit , & i. in phrenitidem si dolor lateris cum bilioso sputo , præter rationem evanescens , ægrum in vehementem & furiosam mentis emotionem agat. aphor. 418. coacis.

## §. XII.

Lateris citra inflammationem affecti , cum turbulentis , tenuibus , moderatis, in phrenitidem labuntur : ibid.

## §. XIII.

In peripneumoniam si abeat, malum est.

## §. XIV.

In suppurationem abit lateris dolor cum diuturna febre , puris enim educationem fore denorat coacis §. 421.

Qui

## §. XV.

Qui subinde horrore corripuntur ad suppurationem deveniunt, quin etiam febris talem ducit ad suppurationem aph. 422.

## §. XVI.

Qui pleuritide laborant, nisi intra dies 14. superne repurgentur, iis in empyema fit mali translatio sect. 5. aph. 8.

## §. XVII.

Qui 7. aut 9. aut 10. die sanus non fuerit, pus intus colligere incipit, libro 4. de morbis.

## §. XVIII.

Ad lateris dolorem insuper accedente strangulatu, suppurationis futuræ spes est coacis §. 113.

## §. XIX.

In gangrænam & sphacelum mutatam pleuritidem, docuit sectio cadaverum, apud Bonetum libro 2. sect. 4. observ. 22.

## §. XX.

In mortem abit, 1. si superveniente peripneumoniâ, omnis sanguis in pulmonibus sistitur. 2. si gangræna communicetur partibus vitalibus. vel 3. si summa acrimonia humorum, prima cerebelli & vitæ stamina destruit. vel 4. si ingenti suppuratione homo plane consumitur. vel 5. si pus in Empyemate pulmones comprimat.

## §. XXI.

Quibus confestim exspuiones cujusvis sunt generis, & dolores admodum acuti, ii tertio die moriuntur libro 2. de morbis.

Densa



## §. XXII.

Densa exercitataque corpora ex morbo laterali citius intereunt, quam quæ sine exercitatione degunt Hipp. coacis aph. 398.

## §. XXIII.

In dolore lateris sanguinis stillatio mala.

## §. XXIV.

Qui in morbo laterali sputa rejiciunt purulenta aliquantulum biliosa, rotunda aut purulenta, aliquantulum cruenta, iis temporis progressu periculum creatur; perniciem etiam denunciant sputa nigra, fuliginosa, aut quibus qualia ex vino nigro fiunt §. 407.

## §. XXV.

In laterum doloribus urina cruenta, obscura cum eo quod subsidet vario, & indiscreto, ut plurimum in quatuordecim diebus mortem adfert; laterum quoque doloribus affectis in propinquo mortem adesse significat, quæ viridis nigrum habet sedimentum, aut furfuribus simile §. 581.

## §. XXVI.

Quibus cum febre, lateris dolore accedente, alvus aquosa, multâ bile permista transmittens, allevationem adfert, dein vero cibos aversantur, & sudoribus diffluunt cum bene colorata facie, & humescente alvo, & dolor aliquis oris ventriculi accedat, ii diutius morbum trahentes, pulmonum vitiis laborantium more intereunt.

## §. XXVII.

Pleuritis cruenta, est & gravis, & vehemens, & lethalis. Hipp. de morbis.

## §. XXVIII.

Si mulieri prægnanti accedat pleuritis, lethalis: Hipp. de morbis.

## §. XXIX.

In morbo laterali alvus perturbata mala est, libro I. de morbis.

## §. XXX.

Pleuritis post alium diuturnum morbum plerumque lethalis.

## §. XXXI.

Quibus in morbo laterali, plurimus ex sputo strepitus sonat in pectore, & vultus demissus est, oculusque aurigine suffusus, & obductus caligine, in his mors expectanda.

## §. XXXII.

Si graviter, ac cum anxietate ferat morbum, corpus afficiatur inæqualiter, thorax & venter urantur, extrema frigeant, alvi dejectiones, & sudores non bene se habeant, non dormiant, ardeant siti, nihil aut paucum, & cum magno conatu excernant, delirent, septo afficiantur, lethale; urina tenuis & subtilis, lethalis.

## §. XXXIII.

Mortis instantis signa sunt, si pulsus sit vermicularis, difficultas extrema anhelitus, frigidus halitus ex ore exeat, nares & auriculæ exsangues sint præ frigiditate, insuper sudor frigidus & madidus emanet, intensa frons sit, & urina ultro profluat, mens moveatur, alvus sponte non sentienti profluat, hæc quoque in limine mortem hære, denotant.

## §. XXXIV.

Pleuritis sympatica sequitur prognosin morbi unde orta.



## §. XXXV.

Epidemica pleuritis sequitur prognosin, ex more illius anni petitam.

## C A P. V I.

### *Cura Pleuritidis.*

**N**aturæ morbis medentur. Natura ipsa sibi, per se, non ex consilio, motiones ad actiones obeundas invenit. Natura equidem a nullo edocta efficit ea quæ conveniunt, juxta observationes fidelissimas Hippocratis, libro 6. sect. 5. aphor. 1. de morbis vulgaribus, & aph. 2. ibid.

Medicus vero est *θεραπευτής* sive minister naturæ, cui si inserviat, & quam obedientissime se submittat, tuto, & certo, tum morbi prognosin tum curam sapissime invenire potest.

Qui itaque morbum sanabit, in suo ægro non solum nomen morbi, & remedia illi morbo vulgo appropriata & laudata consideret, & animo volvat, sed id imprimis Medico sagaci & arte Hippocratica digno semper est summopere prosequendum, ut juxta consilium Galeni in libro de constit. art. Medicæ cap. 18. his duobus morbo inquam, sed & natura, iisque colluctantibus animum semper intendat, atque dum discernit quodnam horum robustius sit, primum quidem secum de salute hominis aut interitu præsagium depromat, dein vero, quo alterum altero fortius esse novit, tum & illius præfinitum tempus agnoscit: tum facile inveniet remedia tuta, salutaria, in morbo unoquoque, in ægro singulo, quocunque in morbi statu, cuicunque temperiei quam maxime accommodata.

Si videat tunc Medicus in suo ægro, morbo prævalere naturam, ex disciplina vere Hippocratica Professoris & Medici Patavini Prosperi Alpini, in præsagiendâ vitâ & morte, (quam disciplinam quoque comprobavit, & summopere commendavit, Britannorum ille Hippocrates, candidissimus & fidelissimus observator Thomas Sydenhamius sparsim in suis operibus, cujus vivum exemplum videre est in curâ, quam instituit in febre continua anni 1661. 1664. & aliis innumeris locis) tunc



spes est, naturam per se, suoque consilio, hunc ægrum, hoste inquilino liberare posse, quare nihil mutandum, nihil contrariandum huic, sed & arte, & auxilio modo adjuvanda; hæc in genere omni morbo convenientia, & summopere utilia, in pleuritide quoque locum habere videbit is, qui sequentia considerat.

Pleuritis sanatur per resolutionem benignam, vel per excretionem materiæ morbosæ.

Resolutionem benignam expectabit Medicus, si humores sint in ægro blandi, si sanguinis circulantis impetus non sit nimius, si vasa non sint nimis dura, rigida, si adhuc in sanguine adsit copia humoris tenuis &c. tunc per omnia simul, quæ in corpore humano concurrunt ad conservationem circuli sanguinis i: e: vitæ, (quæque omnia Hippocrati una voce naturæ recitantur) id continget, ut materia ibi obstruens, per copiam humorum tenuium penetretur, vasa laxentur, amplientur, materia propellatur, vel & comminuetur & sic deteratur, ut insensibiliter cum humoribus reliquis, sine incommodo per omnia vasa fluere possit.

V. S. igitur magna hic metuenda, tollit enim vires, per quas natura, malum vincere debet.

V. S. parva hic æque noxia, auget enim sanguinis circulum, sic & obstructionem, & morbum sponte sanabilem longe reddit pejorem, quod idem expectandum ab omnibus excretionibus artificialibus: id autem Medico unum incumbit, ut naturæ viribus prospiciat, sive medicamenti sive alimentis, mox memorandis.

Ponitur talis casus ubi humores sunt satis blandi, satisque adhuc dum circulationi apti, hinc sola diæta, bono cum regimine, plurimam præstat, qualis diæta tenuis, mollis, parvâ copiâ sæpe repetita, hinc aqua cui incocta sunt lenissima farinacea; notatum superius est, circulationem humorum non multum deviare a naturâ, sed ejus ope materiam morbi solvi insensibiliter, quare Medici semper cogitavere mox de medicamenti solventibus, qualia exhibuere salia volatilia, salia fixa alcalica, v. gr. absinthii, cardui benedicti; alii adhibuere aromata vehementia, & summopere attenuantia, & sanguinis circulum augentia, ea spe, ut vi & impetu deobstrueretur locus affectus, quod aliquando optime successit, unde illa habebantur titulo medicamentorum antipleuriticorum, qualia multa empiricis sub eo titulo venduntur, & in usum revocantur: alii successu talium adhibitorum, vel monitu aliorum incitati, totam doctrinam Hippocraticam conati sunt evertere,



tere, & ex arte Medica expugnare, deridentes crisin & coctionem, quasi in rerum naturâ nullibi existerent, id solummodo intendentes, ut nomen medicamenti expugnaret nomen morbi; sed hæc per transennam, docuit posterior & accuratior observatio, - a tempore Hippocratis, in hunc, quo hæc recito diem, nihil alicujus momenti, additum fuisse doctrinæ Hippocratis in hoc & similibus morbis; quam enim fidelis sit morbi hujus historia, quam certa prognos, quam tuta cura, & naturæ vel genio morbi appropriata, is solummodo videbit, qui præeunte & confirmante experienciâ, rerum omnium doctrinâ, intimam hujus morbi naturam, causam, exitusque varios animo volvat.

Nihil itaque metuo, cur hanc methodum non sequere, nihil video rationis, cur sicut prognos, sic cura non liceret esse plane Hippocratica, sed econtra hanc tanquam tutissimam hic proponere audeo, donec quis exitu bono, nunquam fallaci, orbi erudito demonstraverit, methodum hanc esse perversam, & sibi notam aliam, plane infallibilem.

Secutus igitur scolam veterem, resolventia hic sint blanda salia, in alcali putridum non facile transeunda, qualia sunt, borax, nitrum, &c. quod eo melius est, si arte chemica solummodo depuratum adhibetur, commendatur quoque ab Hippocrate mel, & similes saponem blandi, naturales, ad acidum vergentes: sic tamarindorum pulpa, &c. artificiales sunt syrapi ex vegetabilibus præparati v. gr.

℞. Hordei integri vel avenæ ℥ij. Decoq: in s. q. aquæ s: A: colatur: ℥xx, Adde rob. sambuci vel ribesiorum, vel pulpam tamarindorum ℥ij. vel ℥ijß. vel iij, nitri solâ depuratione præparati ℥iß. vel ij. sumat hujus quantum lubet, sed calide, paucâ copiâ sæpe repetitâ: si consideremus hujus medicamenti usum & vires, hic habemus aquam, summum illud & maximum in morbis acutis solamen, & fere panacæam, per omnia corporis penetralia intima vagantem, non lædentem, libere exeuntem, omnem sanguinis acrimoniam cui miscibilis est, abludentem, & per vias excretionis abripientem, admiscetur ei farinaceum gluten, ut plus sanguini inhæreat. Si tunc parvâ copiâ simul sumatur, ex arte sanguini miscibilis reddatur, nihil in rerum natura existit melius.

Habemus hic nitrum, optimum illud corpus salinum quod sitim non excitat, dissolvit tamen humores & deobstruit vasa, inflammationem nullam auget; habetur hic sapo naturalis vel artificialis & naturalis simul,



sed non alcalicus, at vero blandissime acidus, cujus ope, id quod ab aqua non attingi potest, ei miscibile redditur, & sic quoque resolvi potest; hoc itaque erit cibus & potus, & remedium, vario modo, quoad consistentiam saporemque mutandum, pro variâ ætate, temperie, ægro, & sexu, & consuetudine ægri: medicamenta reliqua hic titulo attenuantium & aperientium possunt sumi ex radicibus graminis, chinæ, sarsaparillæ, & 5 aperientibus majoribus: seminibus bardanæ, petroselini, dauci: ex floribus, sambuci, meliloti: ex herbis, lactucæ omnibus speciebus, endiviæ omnibus speciebus, & cichoreo, & similibus.

Sic v: gr: ℞. radic: asparagi, apii, fœniculi, āā ʒj.

Herbæ lactuc: endiv: rec. āā m ij.

Sem: bardan: dauci: āā ʒi.

Flor: sambuci, meliloti: āā pug: ij.

Coq: ex q: s: aquæ, colatur: ʒxij.

Adde syrup: acetositis citri, ʒi.

Nitri puriss: ʒj, potat item de hoc uti præscriptum est, externa autem medicamenta sint foci mollissimi, ex radicibus althææ, malvæ, herbis brancæ ursinæ, parietariæ, mercurialis: floribus meliloti, rosar, seminibus papaveris albi, avenæ & hordei, quæ possunt coqui vel in lacte, vel in aqua, vel anatrice, & ope pannorum lineorum vel vesicæ inclusa apponi calida loco affecto, & calida servari ope mantiliorum calefactorum assiduo, vel laterum calefactorum, sic v: gr:

℞. Rad. malvæ, althææ. āā ʒβ.

Herb: verbasci, parietar, āā mj.

Sem: lactuc, papav. alb: āā ʒvi.

- - Avenæ - - - ʒi.

Flor: althææ, lilior. albor, āā pug. ij.

decoq. ex aquæ q. s. s. A. colaturæ immergantur panni, & loco applicentur, & calidi teneantur, & continuo hoc fomentum humidum servetur, per spongas exprimendo novum humorem, sic naturâ duce, adjutore Medico, solvitur facile primus hujus morbi gradus.

Hinc patet ad resolutionem hujus obstructionis, non requiri gummatâ resinosa (quamvis in nothâ non sint inutilia plane,) titulo hoc licet adeo commendata, & aliquando exitu comprobata, periculo  
enim



enim sunt plenissima, & sæpe dolorem, & reliqua symptomata adeo augment, ut ægro impossibile sit, amplius ferre, quale nuper nobile vidi exemplum pleuritici, qui hisce impositis, quam maxime de dolore continuo aucto conquerebatur, maxime vero remisso, quando monitu hæc abjiciebat, & lac cum reliquis vesicæ inclusum imponi jubebat: curatur pleuritis per excretionem mali, si ope excretionum commodarum liberetur æger morbo, vel post bonam coctionem materia morbi critice expellatur, in hunc vel illum locum vel extra corpus. Vetus & diu tritum apud Medicos & Physicos fuit axioma, sublata causa tollitur effectus; morbus vero est effectus alicujus causæ, quæ si tollitur, morbum non amplius relinquit, docuit autem Hippocrates in morbis vulgaribus libro 2. sect. vij. aph. xxviii. hæmorrhoides suppressæ nonnunquam excitant peripneumoniam, & pleuritidem, hæc autem mala non prodibunt quam diu libere fluunt, sanabuntur autem illa dum ritu naturali fluere incipiunt, hinc si Medicus ex enumeratione classis causarum apud ægrum invenerit, suppressas hæmorrhoides ipsi tale malum excitasse, nonne plurima ipsi spes curæ erit, si possit huncce fluxum satis liberaliter excitare, præcipue in morbi principio? at vero longe tutius Medico hanc methodum prosequi licet, si videat ægrum suum, fluxui huic obnoxium, jam vero suppressum hunc fluxum ipsi causasse hunc morbum, nonne tunc aureum illud Hippocratis monitum maxime observandum, natura quo vergit est ducenda, quare crisis hæc bona, a Medico, arte & auxilio adjuvetur, & faciliatur: applicabit igitur his partibus fots molles, ex lacte dulci, crustâ panis albi lacte ebriâ, vel fomento præscripto, vel fricentur partes foliis ficus, vel applicentur hirudines, de quibus videantur auctores.

Idem continget fere & observandum est in fluxu menstruo & hæmorrhagia larga narium, juxta Hippocratem coactis prænotionibus Sectione ij. aphor. 150. si adfuerit cervicis dolor, temporum gravitas, oculorum tenebrosa caligo, præcordiorum contentio sine doloris sensu, invitis lachrymis sine lethali signo alio, rubore faciei & pruritu narium: ex his signis futura videtur narium hæmorrhagia, hinc fovendæ nares mollihus aquosis, oleosis, ut laxentur vasa, sanguis tanto melius profluat, nec sistendus nisi necessitate cogente, est enim loco V. S., sed melior.

Solvitur pleuritis quoque critice, quoties urina copiosa crassa, lævis cum sedimento eruo simili, juxta Hippocratem de victu in acutis, tunc danda



danda ex urinam moventibus quæ non calefaciunt, juxta Hipp. de morbis libro 2. illa autem petuntur ex classe blandorum diureticorum, qualia sunt radices apii, petroselini, graminis, asparagi, fœniculi, folia urticæ, petroselini, Eupatorii aquatici, sem. fœniculi, violar. saxifrag. malvæ, baccæ juniperi, sambuci, nuclei persicorum, amygdalæ amaræ, succus citri, limoniorum, vin. mosellanum, rhenanum &c. quæ si sufficienti copia Aquæ incoquantur, commodissime, diuresin excitando materiam morbi hac viâ educunt, maxime si determinantur ad renes, quod fit, si renes laxentur per mollia & blandissima fomenta, quæ ante proposui lumbis & perinæo imposita, deinde injiciantur ex eadem materia emolliente clysmata, diuque retineantur, intus ad renes fit quoque fomentum, minuitur resistentia, sicque urina liberior excernitur, non autem ex his metuendus alvi fluxus cum aquosa ad diuresin, exhibita, intestina crassa non intrent & cum multo major ad renes sit determinatio, sed ut eo fortior illa determinatio sit, impedienda est alia quæcunque humorum excretio, unde perspiratio & sudor impedienda sunt, hæc ratio cur aër paulo frigidior corpori tunc applicandus.

Solvitur pleuritis quoque critice si alvus emittat materiam flavam, biliosam ante quartum diem, copiose cum levamine, juxta Hippocratem in coacis prænotionibus sect. 2. aphor: 386. in laterali affectis alvum emolliere utile est, & libro 2. de morbis, primis quatuor aut 5 diebus paulo magis alvum subducere oportet, quo febres retundantur & dolores minuantur, & de ratione victus in acutis, si lateris dolore adhuc continuo, neque ad calida fomenta remittente, sputoque minime prodeunte, verum citra coctionem extreme glutinoso reddito, quis dolorem ventre mollito non solverit præcipites eos in mortem ducit, & ibidem si angina aut alius lateris morbus ægrum divexarit, medicamentis quæ delinguntur repurgato, si vero detracto sanguine copioso æger debilior videatur, infusum alvi per clysterem 3 quoque die exhibebis.

Patet igitur ex Medicorum Principe, totius fere nostræ artis basi & fundamento, præcipue in his morbis, licere alvum fluere, cum spe criseos bonæ & salutis, observatis præcedentibus, quamvis (in alio tamen casu), videatur obesse aphorismus 16. sect. vi. quod idem affirmat præstantissimus author Græcus (post Hippocratem) Aretæus Cappadox de ventre bilioso, in ejus descriptione pleuritidis; præeuns igitur natura rursus est ducenda quo vergit, artis auxilio per medicamenta alvum laxantia, emollientia dicta Hippocrati, qualia nobis tali in casu exhibet



exhibet Sennertus, tamarindos, cassiam, mannam, syrupum rosarum & similia quæ sunt blanda acida, vegetabilia saponacea, quæ etiam præscriptis medicamentis admisceri possunt, ad unam duodecimam, sicque victus laxans habebitur totum abdomen foveatur fomentis ex præscriptis decoctis emollientibus; injiciantur clysmata emollientia non stimulantia acria, qualia parantur ex decoctis herbis emollientibus in lacte vel aqua, sero lactis &c. addita pulpa tamarindorum ad ℥i. vel ℥i℥. ad ℥xij. decocti, & nitri ℥j. m. f. clyσμα.

Solvitur sputo pleuritis, & adeo quidem commendatur hæc evacuatio, ut in pleuriti de primas obtineat coctionis & cruditatis, juxta aphor. xij. sect. j. in pleuritide si sputum statim appareat in initio, intra tertium diem brevem morbum indicat, sin vero posterius, longum, & prænotionibus coacis sect. ij. aph. 385. sputum quodcunque dolorem solvit, bonum est ib. aph. 391. item aph. 393. sputum ex spuere prompte, bonum est. Si 3 die extussiat lævia æqualia, humida rotunda, 7 die liberantur juxta Aretæum Cappadocem.

Adeo ut sputum judicetur bonum Criticumque, a tempore, modo excreandi, qualitate & effectu, quæ si præcedentibus congruant, spem adferunt Medico, huic viæ natura præeunte, debere cum successu insistere, emollienda itaque sunt vasa per quæ excretio fieri debet, depuranda, & leniter stimulanda, evitatis omnibus reliquis quibuscunque excretionibus, quare ingerenda sunt blanda, mollia, qualia superioribus casibus præscripti, malva, branca ursina, verbascum, violaria, his adduntur lenia stimulantia, agrimonia, taraxacum, detergentia, glyceryzæ radix & succus, & mel, juxta Hippocratem &c. Si ex his fiat decoctum, assiduo sed pauca copia calide sumatur, fiet materies humida, mollis, lubrica, vasa fient laxa glabra & interim leniter se contrahentia, unde multo facilior fit hæcce excretio, præcipue si adhibeantur vapores, hujusmodi per tubum in asperam arteriam attrahendi, reliqua videantur in Hippocrate, ubi agit de facili excretionem sputi.

Hæcce methodus est, qua natura sæpe cum paucis vel nullo artis auxilio sanat & evincit hunc morbum adeo perniciosum, vel solo nonime, ex eo quod tot hominum millia hac clade intereunt, quæque si rite prosequatur ab artis perito, bona satis reperietur.

Verum enim vero horum omnium nihil si compareat, sed respiratio sit admodum difficilis, sputum non prodeat, tussis molestissima, arida sit, dolor sit acutissimus, fixus, pungens, febris acutissima ardens, pulsus durus, celerrimus, ( nisi impediatur ob retentam animam, ) in homine satis fortis, temperamento sanguineo, ætatis flore, tunc nulla spes ex molimine naturæ exoptanda, sed accuratissime secum consideret Medicus naturam plus occidere, quam morbum vincere posse; hinc arte, sine ullo alio morbo



sanatur sequenti modo.

Venæ sectio fiat cita, magna, ante diem tertium, celeris fluxu accelerato, ex magna vena, per vulnus ingens, corpore supino quiescente, aucta respiratione, tussi, & suspiriis; locus affectus interim eo tempore foveatur, & leniter per fricetur, ad ℥x. secundum Sydenhamium, vel ad leve animi incipiens deliquium vel magnam & notabilem doloris remissionem; ea V.S. si dolor redeuns vehementer augeatur, eodem die repetenda ad ℥x. & die sequenti, & 3. & 4. (nisi æger prius convaluerit) si dolor & alia symptomata vehementer ingruant: at vero si vel remissior sit morbus, & patiatur ut lentiore pede progredi possit, vel dejectæ ægri vires facile non ferant V. Sectionem post tam brevia intervalla repetitam, tunc non repetenda est V.S. bis celebrata, nisi interjecto uno aut altero die, inter singulas vices, considerata morbi violentiâ & ægri viribus; quamvis accurata pleuritis, prout observarunt accuratissimi Medici, non sanetur facile per solam artem, nisi post educationem ℥xxxx. sanguinis in adultis, ubi tamen bis, aut semel secasse venam pueris sufficit.

Quid igitur juvat V. S., ope cujus ℥iv. vel vi sanguinis educuntur? est sane damnosa, experimentis contraria, semper occidens, nisi morbus fuerit per se sponte sanabilis, nullum enim dolorem vel ad minimum gradum minuit, febrem neutiquam minuit dum sanguis fluit, sed contra statim augeat, prout casui adfui tenens ægri arteriam, ubi hæc fuere quam verissima, nolentibus amicis & chirurgo, (quamvis annuente ægro) plus quam ℥v. circiter educere, quamvis monerem Chirurgum & amicos, nihil potius faceret quam videndo aliquid efficere, ægrum in mortem certissimam & citissimam incidere fieret quod idem exitus comprobavit, quam sine dubio præcavere potuisset, si hac methodo usus fuisset, & quod magis hanc praxin confirmat, nihil plus optavit patiens, quam quod Chirurgus (quem timiditatis accusabat) me monente, plus sanguinis sibi non eduxerat: monui interim sibi præscriptam methodum applicari curaret vel (quamvis præmonerem nullum adhuc signum læthale adesse), alias certam mortem sibi expectandam esse, ad minimum suppuratum futurum esse latus affectum, unde vel suffocaretur ilico pure effluente, quod quoque post dies aliquot contigit, vel sursum per sputum evacuetur, vel tabe longâ periret, vel unicam difficilem tamen spem esse, si pus extrorsum ex pectoris cavitate educi posset, sicque ægrum liberaret.

Hinc discimus, cur larga narium hæmorrhagia Hippocrati habeatur tam bona, sanguinis ex naribus stillatio adeo pronuncietur læthalis.

Statim post V. S. applicentur fomenta laxantia, qualia plurima antea exhibui; unguenta laxantia, quamvis non adeo bona hic quoque conveniunt  
v: gr: ℞. ol: amygd: dulc: ℥ij.

unguenti



unguenti pomati dialtheæ āā ʒj. m: f: ung.

medicamenta interna sunt aquosa diluentia, humectantia, emollientia, resolventia, detergentia, qualia antea exhibui.

Vitentur in diætâ carnes & juscula earum, sed sumat juscula hordeacea, in potu ptisanam, eum in finem ut putredini resistent.

Æger non nimis æstuet, sed liberum ei sit, ut lecto quotidie eximatur, ad aliquot horas prout vires ferunt, alias enim nec larga V. S. nec alia remedia æstum temperare possunt.

Ex his patet, pleuritidem per se non sanabilem, artis tamen ope superandam, tuto non tractari posse, nec sanari, nisi largâ, & cæteroquin evitanda sanguinis missione, in quâ una, sola tunc spes curæ & vitæ expectatur, quidquid obclament, qui hanc methodum ex schola Medicorum expungere suis scriptis satis acutis, summis viribus conantur, an autem V. S. sanguinem educens, demit homini vitæ fontem, nunquam postea recuperandum? an sanguis est pars corporis solida, quæ semel ablata renascitur nunquam?

An sanguine Venâ educto, necessario debet sequi cachexia; hincque loco mortis celeris, misera & languida vita ex S. M. expectanda? an Medicus accusandus homicidii, qui ægro sub prætextu curæ stamina & primordia vitæ demit?

Si consideremus hominem ex sanguinem ( ut ita loquar ) morbis acutis non opprimi, nec interire facile.

Si consideremus morbos acutissimos certissimo abire suâ naturâ & tendere in mortem, sed plurimam spem fuisse semper ab Hippocrate notatam in sanguinis largâ excretionem ( non vero exstillatione ) sive per nares vel per alias quascunque vias accommodatâs, quod quoque verum prædixit de quorum cunque humorum largâ excretionem.

Si consideremus, homines ad necem fere omnem sanguinem amisisse, sive hæmorrhagiâ spontaneâ, sive ex vulnere, postea tamen fuisse plane restitutos sanissimos, & quam maxime alacres.

Si consideremus, ( quod in institutionibus Medicis demonstratur ) ex cibis fieri chylum, & ex chylo sanguinem.

Si consideremus, cachexiam ab sanguinis inopiâ non fieri, nisi per errorem, dum homo plus assumit quam concoquere potest, nonne objectiones priores evanescunt? & Medicum audaciorem reddunt, qui tuto, & ex artis dictamine hanc methodum sequatur? puto imo: ut autem magis confirmetur hæc praxis, remitto L. H. ad authores Medicos prudentes, & fideles observatores, nullo partium studio addictos, sed solâ observatione doctos, ubi reperietur hæc methodus semper comprobata, & quamvis sæpe nonnullis jactatoribus fuerit rejecta, postea tamen semper iterum reassumpta,



spretis quibuscunque remediis antipleuriticis dictis, quippe quibus nulla certa fides adhibenda, nec ulla cura adscribenda in hoc casu: Quamvis plurimi, quid boni a S. M. expectandum sit, non assecuti fuerint, ignorantes scilicet sanguinis circulum, non tamen omnino aberrarunt à scopo dum alii, id sanguinis cacoehymici emendandi, alii obstructionis referendæ gratiâ efficere conati sunt, modo rite mens eorum explicetur: ut autem ratio pateat, cur ab optimis Medicis larga adeo missio sanguinis, instituatur, hæc sequentia profero ex morbi Theoriâ sumpta, & unicuique œconomiz animalis gnaro considerata offero, suppuratio, peripneumonia, phrenitis, gangræna & sphacelus sequuntur a solo sanguinis impetu & cacoehymiâ, circulo sanguinis, aucta: sanguinis vero circulus non tutius minuitur & citius in hoc casu quam V. S. ergo præcaveri una possunt hæc omnia mala, si non læthalia saltem summo periculo plena.

Sanguinis circulus adeo in pleuritide accuratâ augetur, quia continuo crescit proportio sanguinis respectu vasorum, nihil autem tutius & citius illam proportionem restituit, quam sanguinis imminutio, quod non fit tutius (si ex arte) quam per V. S. ergo.

Sanguinis circulus, continuo auctus per vim morbi, erat causa doloris, caloris summi, & reliquorum effectuum adeo damnandorum, sublata ergo sanguinis circuli vehementiâ & celeritate, tolluntur quoque omnes illi effectus, sed id optime fit per V. S. ergo.

V. S. dat locum ut novi humores blandi in corpus ingerantur, & remedia in usum revocentur commoda, & sic spem dat curæ tutæ sine metu subsecutorum reliquorum effectuum. nonne id a Medico probo exoptatur?

In pleuritide epidemica, plurima spes curæ innotescet, si ex consuetudine illius anni noscatur morbi indoles, & inveniatur antidoton veneni in aëre sparsi, quod si non succedit, tentanda est præcedens cura in omnibus; ubi notandum tamen, sæpe multa in his casibus præstitisse spiritus acidos artificiales, v. gr. sp. vitrioli, sp. nitri &c. si præscriptis decoctis admisceantur ad lenem aciditatem, plurima autem eorum virtus est, inhibere summam putredinem, adeoque gangrænam læthalem.

Pleuritis sympathica curatur ex cognitione morbi, cujus est effectus.

Hæc sunt Humanissime Lector, quæ de primo hujus morbi statu, ex authoribus descripta proponere ausus fui, sperans neminem male laturum quod quædam inveniantur, quæ forte sibi minus placent, gnarum impossibile plane esse unicuique satisfacere, sed hæc nonnullis probata, aliis summo opere culpata haberi; sequerentur jam ex ordine alii hujus morbi exitus, supra per transennam memorati, sed brevitati studens, & contentus eo, quod satis fecerim scopo, quem mihi proposui, remitto lectorem ad authores, huicque dissertationi impono





